

445

L

117



Early European Books, Copyright © 2011 ProQuest LLC.
Images reproduced by courtesy of Koninklijke Bibliotheek, Den Haag.
445 L 117





Early European Books, Copyright © 2011 ProQuest LLC.
Images reproduced by courtesy of Koninklijke Bibliotheek, Den Haag.
445 L 117



Early European Books, Copyright © 2011 ProQuest LLC.
Images reproduced by courtesy of Koninklijke Bibliotheek, Den Haag.
445 L 117




Early European Books, Copyright © 2011 ProQuest LLC.
Images reproduced by courtesy of Koninklijke Bibliotheek, Den Haag.
445 f 117

445 L 117

K. W.





22
4452 117.
ISAACI VALCKENAER
ORATIO

D E

PACE, ALMA HUMANA-
NITATIS NUTRICE.

Dicta publice in Curia Urbis Leovardiæ,
A. D. VII. Id. Dec. CIO. IOC. XCVII.

*Quum Rector Gymnasii littera-
rii ibidem inauguraretur.*



LEO V A R D I Æ.

Ex Officina HERONIS NAUTÆ, Biblio-
polæ ac Typographi. CIO. IOC. XCVIII.



REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

REINHARD V. A. G. B. A. R. A. T. A. R.

AMPLISSIMIS, PRVDENTISSIMIS,
& SPECTATISSIMIS FLOREN-
TISSIMÆ CIVITATIS LEO-
VARDIENSIS MAGI-
STRATIBVS;

C O N S U L I B U S :

LAMBERTO FENEMA.
JARICHIO BANGA,

RATIONIBUS REIPUBLICÆ FRISIACÆ RE-
COGNOSCENDIS QUATUOR-VIRO.

CORNELIO STRIGE-
LIO I. U. D.

EPÆO WIELINGA,

ILLUSTR. AC PRÆPOTENT. FRISIÆ ORDINUM
DELEGATO NOVEN-VIRO.

S C A B I N I S.

ZACCHÆO ABBEMA.

JOHANNI EMMENES.

BENNONI BOURBON.

FEL-

FEITONI WESSELIO I. U. D.
HORATIO VITRINGA.
VIGLIO CRANS I. U. D.

Æ D I L I B U S:

CORNELIO HARMANNI
VISSCHER.

RINTIO HOOGHSLAG.

UT & CONSULTISSIMO AC INTEGRRI-
MO VIRO,


MEINARDO DO-
TINGH I. U. D.

IISDEM AB ACTIS & DECRETIS.

GYMNASII LITTERARII, EJUSQUE MODE-
RATORUM PATRONIS AC MÆCENA-
TIBUS BENIGNISSIMIS

S. P. D.

ISAACUS VALCKENAER.

ui sui fœtus ingenii præclaris Viris dedi-
care in animum inducunt, id sibi negotii
credunt vel inprimis dari, hujus sui con-
silio causas publice ut ostendant, atque
approbent. Quodcum operosius nonnun-
quam faciant; tum illud tamen sere apparet, magis esse
humanitatis eorum, quam vel officii, vel muneris.
Ego vero, cum hæc in publicum edenda esset scriptio,
pulchre videbam de nulla istiusmodi re mihi quicquam
esse laborandum. Nam quis, quæso, sit tam in-
sulsus, qui, nisi me credat ab omni etiam Humanita-
te, quam in fronte ipsius Orationis profiteor, alie-
nissimum; titulo lecto, non extemplo per se judicet,
eam nulli alii, quam Vobis, Viri Amplissimi, con-
secratam esse, vel certe consecrandam? Quod si mei
arbitrii, meique consilii res simpliciter fuisset; ego,
ut modeste semper de me, meisque sensi artibus, intra pri-
vatos eam cancellos haud dubie conclusissem. Iam ve-
ro cum id sine injuria & Urbis, & Scholæ vestræ
facere non potuerim; est profecto, quod mihi gratu-
ler ac gaudeam, tales ei obtigisse Patronos, quibus ni-
hil fieri potest humanius, nihil litterarum amantius.
Vos enim ii estis, per quos effectum est, ut hæc Vrbs
majorem indies præ se ferat Humanitatem, iisque ex-
splendescat ornamentis, quæ ad commoditates civi-

um pertinent: eo cultu, nitore, ac venustate viarum,
ædificiorum, nemorumque, ut nulli, ne politissimæ qui-
dem in Batavis concedat. Vt jam non dicam, quanta cu-
ra, diligentia, ac benignitate conseruetis, ornetis & au-
geatis Scholas, veras illas Humanitatis officinas. Qua-
re quam præclare mereamini, non tantum de civibus
vestris: sed & de omni nomine Erisiaco, quis non videt?
Sed ne longiore sermone vestra remorer tempora, desi-
nam, id unice orans, uti hæc solennia mei apud Vos mu-
neris auspicia lubenter audivistis; ita eadem nunc re-
præsentata placido vultu, ac benevolo recipere velitis
animo: atque ita habeatis, tum demum voti me
damnatum fore, ubi quotidiana Spartæ curatione
Vobis placere, laborisque mei fructus approbare po-
tuerō. Valetē Viri Amplissimi, remque publicam
bene ac feliciter diu gerite. Leovardiae prid. Kal.
Ian. ClO: IDC. XCVIII.

ISAA-

ISAACI VALCKENAER ORATIO.

NOBILISSIMI, AMPLISSIMI, PRVDENTISSIMI HVJVS
VRBIS PROCERES;

QUIQUE IIS ESTIS AB ACTIS ET CONSILIIS VIRI SPE-
CTATISSIMI, CONSVLTISSIMI, INTEGERRIMI.

REVERENDI, ERVDITISSIMI MYSTERIORVM DIVI-
NORVM INTERPRETES, SCHOLARVM CVRATO-
RES.

HONORANDE CONRECTOR, CÆTERIQUE PRÆCE-
PTORES SOLERTISSIMI, COLLEGÆ CONJVNCTIS-
SIMI.

QVOTQVOT PORRO ADESTIS, CVM CIVES, TVM
HOSPITES, QVACVNQVE DIGNITATE, ARTE, DO-
CTRINA CONSPICVI.

TVQVE INPRIMIS PRÆSTANTIVM ADOLESCENTIVM
LECTISSIME GREX, SPES PATRIÆ, SEMINARIVM
ECCLESIAE AC REIPVBlicÆ.

Etsi natura ipsa ita comparatum
est, Auditores, ut præsenti-
bus rebus non adeo contentus quis-
que, futuram sortem sibi persuadeat fo-
re meliorem: blandaque, quamvis fal-
laci spe tantum spectet & enumeret
commoda, quæ inde percepturus vide-
tur, non subductis illis incommodita-
tibus

A

tibus , quæ quascunque vicissitudines humanas comitari solent ; tamen ejus opinionis , quam ante plusculos annos conceperam , perpetuoque foveram , tantam nunc sentio esse fallaciam , tantumque errorem , ut vix quicquam magis temere unquam mihi videar sperasse. Nam cum ante novem fere annos adolescens admodum ad provinciam hanc scholasticam accederem primum , & ineuntis muneris auspicium publica oratione faciundum esset ; ego quidem partibus iis defungebar , tanta cum trepidatione animique inconstantia , quantam in eam mediocritatem , vel tenuitatem potius , cadere necesse erat. Interea vero ipse mihi blandiebar ea spe , siquando denuo ad hanc aleam vocarer , fore , ut & provector ætas , & uberior doctrina , & frequentior usus plus facultatis adferret , quam adgenita hæc
vere

verecundia debilitare me posset ac frangere. Sed quanto in errore versatus fuerim, cum alias sic satis; tum nunc vel maxime intelligo. Idque, me etiam tacente, abunde declarant & hic oris pallor, & attonitus vultus, & præpedita lingua, & hæsitantia verba. Scilicet non prospiciebam ego, quæ mentis humanæ cæcitas est, neque accurata satis ratione subducebam cunctas illas conturbationis causas, quæ nunc me certatim quasi circumvallant, & de robore præconcepto dejiciunt: ut hinc pudor meus tenuitatisque sensus: inde splendor nobilissimæ hujus Urbis, præsentia tot gravissimorum & eruditissimorum hominum, ipsaque amplissimi hujus loci majestas. Nam quid animi creditis mihi esse, consideranti graves atque duras provinciæ meæ partes? Mihi tantum quod adulescentiam egresso demandari

A 2

ju-

juventutem splendidissimæ hujus Urbis, florem gentis Frisicæ: meque hodie suffici in locum eorum Virorum, quos constat tam singulari fuisse doctrina, tam subacta ac recondita maximarum artium scientia, tanta in docendo subtilitate ingenii, ut eorum æquiparare virtutes, magnum quid: *velle* superare extremæ dementiæ videatur. Vos quidem, Auditores, si oculos in me, meamque juventam conjiciatis, non dubito, quin ejusmodi esse existimetis; quod & ego sentio, ut neque ingenii, neque doctrinæ ornamentis, neque usu sim cum illis, multis partibus comparandus. Ac de nostra tenuitate plura hoc loco dicerem, nisi verendum esset, ne modestiæ causa magis, quam quod vera putem, hæc a me dicta esse viderentur. Illud autem jure suo quis miretur, quæ cuncta mihi pleno diffidentia curam hanc

hanc injiciunt ; ea vel imprimis fuisse, quæ ad spartam hanc capeffendam me impulerint. Etenim cum jam sextum annum præessem illustri Campensium Gymnasio , meæque informationis fructus perciperem exoptatos ; e statione illa honorifica , commoda , jucunda, nec minus fructuosa devocari me huc , avellique patior : quamvis Civitatis illius Procere nihil non agerent , ut me in ea retinerent , proposito lautiore stipendio , aliisque utilitatibus. Quibus ego repugnare nullo modo valuissem , nisi præcipuus quidam & incredibilis erga hanc gentem amor me jam præcepisset , auresque omnibus precibus & pollicitationibus obstruxisset.

Qua in re pietatis quoque , officii-que partes implere mihi videbar. Nam siquid est in me eruditionis , quod majore cumulo auctum velim , aut

siqua exercitatio docendi, in qua jam annos aliquot non prorsus sine laude versatus sum, aut siquid alterius artis ab optimarum disciplinarum studio profectum; earum rerum omnium Tu mea Frisia unice fructum a me repetere jure tuo potes & debes. Tu quippe hospitem me & orbem benigne excepisti, sinuque molliter fovisti. Tu me rudem & indoctum præstantissimarum artium succo largiter irrigasti. Tu ignobilem me & neglectum hominem in lucem protraxisti, & ad clavum, non infimæ ditionis tuæ Scholæ collocasti. Tu altera vocatione tuam erga me declarasti benevolentiam, honorificumque de conatibus meis judicium, cum lectissimæ tuæ sobolis studia mihi committeres. Hanc itaque vocem, hanc solertiam benignitate tua formatam usibus tuis subducere, religio mihi erat: qui

qui quicquid in me est, id tui esse beneficii lubens lætusque agnosco, semperque agnoscam. Id unum velim, Optima Mater, credas tibi que persuadeas, tanto me æstulare ardore tibi bene de me meritæ gratias referendi, ut, nisi expectationi tuæ faciam fatis, vitam mihi acerbam putavero. Nam ut dicam, quod sentio, & libere dicam; habet, nescio quid, ipsius terræ tuæ genius, & indigenarum tuorum indoles, quod animo meo mirifice semper placuit, effecitque, ut levia etiam mihi fuerint incommoda illa atque molestiæ, quibus conflictabar, asperiore hoc cælo, ad te proficiscens: cumque antea bidui vel tridui navigationem difficillime ferrem, ægreque corporis valetudinem sustinerem; nunc animus, præ cupiditate tui, suffecerit novas vires.

Miramini forsan, Auditores, longior
rem

rem hanc meam præfationem: nam indigne eam vos ferre quo minus putem, facit singularis vestra humanitas, & attentio. Sed dabit, spero, veniam huic meo erga patriam vestram studio, quod me paulo longius abripuit: simulque æqui bonique consulatis, rogo, quod argumentum tumultuario stylo inter varias curas & sollicitudines conscriptum, nequaquam eas habet dotes ac veneres, quæ polito & acerrimo vestro iudicio placere, nedum tritis vestris auribus suaves insidias facere possint. Ipsi enim, Amplissimi Viri, testes estis, ut ego omnem existimationis meæ famam, quæ hac in parte versatur, postposuerim & abjecerim, modo desiderii vestris morem gerere possem.

Atque hoc tanto justius a me peti contendique arbitror, quo ipsius materiæ licet rudis & indigestæ tanta est sua-

suavitas, ut ejus solum nomen, & exilis
species mirificum quendam in omnium
audientium ac cernentium animis exci-
tare amorem sui possit. Etenim cum
viderem publici muneris auspiciū ab
oratione aliqua ducendum esse, primo
quidem dubius diu hæsi, quod argu-
mentum seligerem huic & loco, &
tempori, & personæ meæ non incon-
veniens. Cumque aliud ex alio medi-
tarer, & plura non aliena viderentur:
cæteris tamen repudiatis, vel in aliam
occasionem rejectis, conditioni præsen-
tium temporum, quibus navis publicæ
rei e calamitosissimi belli procellis in
amoenissimum tranquillitatis portum
tantum quod appulsa est, & illud dan-
dum videbatur, ut in hac politissimorum
hominum celebritate potissimum age-
rem de PACE, ALMA HUMANITATIS NU-
TRICE. Consideranti quippe mihi ipsum
B illud

illud temporis punctum, in quod conferre vocationem meam summum Numen voluit: simulque diem nuperi mei in hanc Urbem adventus eum esse, quo pacis lætissima promulgatio fieret, singulari aliquo fato ad placidam hanc materiam trahi videbar. In qua & illud lætandum mihi arbitror, quod in ea Urbe dicendum mihi hodie est, quæ cum primaria est Frisiæ, aliasque magnitudine, splendore, nobilitate, opibus superat: tum magis hac laude vincit omnes; quod venerabile Musarum domicilium, sedemque dulcissimam ipsa hic collocavit HUMANITAS. Et quod ego maximum duco, dicendum apud Vos, qui pulchritudinem ejus ab ineunte ætate sic adamastis, ut ne hanc quidem hujus vitæ lucem, atque hunc coeli spiritum existimaveritis vobis jucundum esse posse, si ejus fructu carere debe.

deberetis. Quare vos tantum breviter oro & obtestor, ut mihi de pulcherrimo Dei munere ac dono; cuius potiundi facultas superioribus annis ademta, nunc denuo suppeditatur, deque maximo Scholæ vestræ ornamento, in quo excolendo mihi quotidie laborandum esse videtis, verba facienti benevolentiam humanitate vestra dignam tribuatis.

Juvenalis, acerrimus ille Romanæ luxuriæ censor, versus Ciceronis ridenda vocat poëmata: verum hoc Oratoris illius dictum, quamvis metro adstrictum, quis sanus risu, & non summa potius veneratione dignum censeat?

Cedant arma Togæ: Concedat laurea linguæ.

Nobilis profecto, gravis, ac magnifica sententia: modo sua ei constare possit veritas illibata. Nam quid ais, Marce

B 2

Tul.

Tulli? Itane vero alto supercilio despicias illas artes atque studia, quibus Martia gens a tam tenui initio ad id magnitudinis fastigium adscendit, quod omnis Orbis adoravit? Itane una sententia damnas & abjicis cuncta pericula atque labores, quibus excellentissimi Viri patriæ tuæ splendorem: sibi ipsis immortale nomen ac decus peperere? Levibus itaque Græculis, vel segnibus ac umbraticis quibusdam doctoribus postponis tu fortia illa pectora, & Romulos, & Tullos, & Horatios & Camillos, & Cincinnatos, & Fabricios, & Fabios, & Marcellos, & Scipiones, & Marios, & ipsa illa fortunæ ludibria, Cæsarem ac Pompejum? Non ea quidem, Auditores, prorsus mens Ciceronis, qui contra sæpe agnovit ac professus est virtutem, industriam atque labores summorum
im-

imperatorum , fortissimorumque militum multum , imo plurimum valuisse ad constituendum amplissimum illud imperium ; sed tamen omnibus rerum momentis accurate perpensis , eam pronunciare coactus est sententiam , qua priores partes tribueret Paci , Pacisque artibus. Perspiciebat enim Vir ille prudentiæ non minus , quam eloquentiæ laude cumulatissimus , cuius toga omni sago felicior atque illustrior fuit , universas illas rerum fortiter gestarum laudes , omnesque triumphorum & ovationum pompas in tenebris jacere , nisi litterarum lumen accederet. Et , quod nostro iudicio palmarium est , exploratum habebat Vir sagacissimus , suoque exemplo in opprimenda teterrima illa Catilinæ conspiratione didicerat , bellicis artibus propagari forsan imperii terminos : augeri Rempublicam provinciis , copiis ,
B 3 glo-

gloria: pacis vero studiis optime eam conservari et administrari. Jis enim solis acceptum ferendum esse omnem ingenii cultum, omnem vitæ elegantiam, morum comitatem, splendorem litterarum, prudentiæ ac gravitatis omne pondus: verbo ut dicam, *Pacem Humanitatis esse nutricem.*

Non enim eam tantum dicimus Humanitatem, quæ morum quædam est facilitas, animique benivolentia erga quoscunque homines; qua notione vulgo accipitur: sed quæ priscis & idoneis auctoribus, ut erudite docet diligentissimus antiquitatum & verborum Gellius, significat omnem eruditionem & informationem, quam Græci παιδείαν vocant, complectiturque universum bonarum artium chorum, quæ *Humanitatis studia* Ciceroni dicuntur. Nec temere profecto eam huic voci notationem indidi-

didisse sapientissimos mortales docet ipsum etymon. Ex omnibus namque animalibus soli homini, cælesti beneficio, privum atque proprium datum ac concessum est, ingenium variarum rerum cognitione exornare & polire: prudentia ac ratione uti in gerendis negotiis: solerti industria linguas, disciplinas atque artes sibi comparare. Quod quousque diligentius ac fidelius curæ sibi habuerit, næ is erit cum humanissimus dicendus; tum erga alios reperietur ingenio quam maxime facili, benivolo, pacisque ac societatis amantissimo.

Jam vero amabilissimæ hujus Humanitatis fontem & originem, imo conservatricem esse Pacem; ejusque tribuendum clementiæ, quicquid illustri hoc nomine censeriqueat, cui quæso paulum humaniori obscurum esse potest? Pax etenim reddit hominem demum humanissimum.

manum, id est, vere hominem: conservat non tantum, sed auget, quicquid in eo est mitis ac placidi ingenii: subjicit eum imperio rationis, emollit asperos mores: abducit eum a ritu vivendi more ferarum. Pax est fons omnium amicitiarum, conjunctionum, necessitudinum ac societatum. Quare apud Aristophanem poetarum festivissimum pax ita compellatur. *O gravissima regina dea, veneranda Pax, domina chororum, regina nuptiarum! O Veneris atque Charitum socia, quam tibi venusta facies! o dea Pax! tecum da posse extendere vitam.*

Quod si prima mundi incunabula respiciamus, & illic consideremus hominem ab opifice suo recens fictum atque formatum; quam illustrem, quam magnificam ac solidam illic deprehendemus Humanitatem: sed cujus fundamentum atque scaturigo erat aeterna illa Pax: de-
fide-

sideratissima consuetudo , jucundissima simul & gloriosissima conjunctio , quæ intercedebat ipsi cum Conditore suo ! Ubi illustratus radiis majestatis ac benignitatis divinæ floreret in summo Humanitatis gradu ; tanta luce mentis , tanta perspicacia ingenii , tanta bonitate voluntatis , tanta tranquillitate & hilaritate animi , notitia denique rerum tam varia atque immensa , quantum inesse oportebat in eo , qui præstantissimæ illius naturæ , quam divinam dicimus , imaginem gereret. Tanta porro lenitate ac mansuetudine erga consortem suam : ejusque vicissim erga ipsum : indole cunctorum animantium tam placida atque miti , ut vix mente concipi , nedum verbis exprimi a nobis possit. Quam quidem felicitatem Poëtas designasse per mollia ac læta aureæ ætatis tempora verisimile est. At

C

ho-

homine ex arce beatissimæ illius Pacis per vecordiam lapsumque suum deturbato, quanta illico, & quam deploranda consecuta est amissio ac diminutio eximiæ illius Humanitatis! Tantum mutatum est sanctius illud animal, mentisque capacius altæ, ut feræ nomine potius ac belluæ, quæ in omnem ferociam, atroces iras, ferales discordias, foedas libidines, immanem sævitiam prona & abjecta est; quam hominis nomine dicendum sit.

Verum enimvero, ubi summo illi rerum Arbitro visum fuit, pro infinita sua bonitate, in gratiam redire cum perduto hominum genere, suamque ultro dulcem ei præstare benivolentiam; statim quoque restitui Pacem, tollique exitiale illud dissidium voluit. Hinc quos Pacis illius beneficio affecit, eos omnibus quoque Humanitatis opibus cumulatifime

sime ornavit, ut Enochum, Abrahamum, Isaacum, Jacobum, Jobum, Josephum, Mosen, Davidem, Salomona aliosque; quorum sapientia, eruditio, vitæque integritas, tanquam tot lumina exsplendescabant. Quin cum ipse Deus vindex & assertor prolapsi humani generis, auctor, princeps, atque columen Pacis: æterni Patris æterna progenies cælo delaberetur in terras, Humanitatemque fanciendæ Pacis ergo adscisceret, summam suam erga miseros homines demonstraturus *Φιλανθρωπίαν* ac beneficentiam; pacatum ac tranquillum ex maximis bellorum motibus jussit omnem esse Orbem: Jani templo pacis bellicue pignore, rara inter Romanos felicitate, per Augustum clauso.

Atque hoc, quod contendo, ita clarum ac manifestum est, omniumque sæculorum experientia comprobatum, ut

nullam nationem , nullam gentem exstitisse reperiās , quam , cessantibus vel interquiescentibus armis , Pacis benignitas non applicuerit ad mitiorem ac cultiorem vitæ usum , inque Humanitatis penetralia , leni quasi manu , nec opinantem deduxerit. Testes nobis sunt Isrælitæ , qui primum per solitudines Arabiæ , dein in ipsa Palæstina perpetuis bellis adversus incolas atque vicinos conflictantes ; horridi , inculti , & expertes politiorum disciplinarum vitam transegerunt : pacata vero Salomonis ætate , tanto florere proventu eruditorum Virorum , solertiumque in omni scientia artificum , quantum postea inter eos exstitisse nunquam , credibile est. Quippe quorum opere manu atque consilio Hiërosolyma non tantum , reliquæque Palæstinæ urbes omnibus ædificiorum ornamentis excultæ sunt : verum etiam
ex.

exstructa est splendidissima illa ædes, magnifica illa gloriæ divinæ arx atque sedes; quod & miraculum, & gaudium totius orbis: norma certe & exemplar perfectissimæ architecturæ a posterioribus sæculis habitum est. Testes sunt Chaldæi, Ægyptii, Medi atque Persæ; qui victricibus armis, bellorumque impetu validas forte gentes debellarunt, magnas hominum strages ediderunt, ingentes imperio terras adjecerunt, superbas & opulentas urbes in potestatem redegerunt: at per amœna & fructuosa Pacis tempora, cum artes atque disciplinas tam gnaviter excoluerunt, ut reliquis omnibus populis copiosissimum earum mercatum præbuerint; tum egregia opera, mirificasque pyramidum moles excitarunt. Quorum alia miraculo ac invidiæ pluribus sæculis fuere, alia etiamnum omnium ad-

C 3

mira-

mirationem habent, rerumque humanarum ætatem æquatura videntur. Testes porro sunt Græci ac sigillatim Athenienses, qui a primis initiis, ut reliqui mortales, nondum neque naturali, neque civili jure descripto, fusi per agros ac dispersi vagabantur: ritumque ferarum in sylvis & lustris vivebant, tantum habentes, quantum manu ac viribus per cædem ac vulnera aut eripere, aut retinere potuissent; donec eos primum Cecrops, deinde Minos atque Theseus in societatem redigerent: almaque Ceres, fida illa Pacis cultrix & antistes, Thesmophoriis seu Mysteriis, ut fabulæ ferunt, beaverit. Testes sunt prisca Romani, quos rudes litterarum, carentesque omni humaniore cultu continua sexcentorum fere annorum bella exercebant; per quæ pila mittere, gladios stringere, hastas vibrare, & ut Poëta canit:

Pa-

Parcere subjectis, ac debellare superbos;

Ipsis non tantum artes erant atque studia : verum eo progrediebatur intonsæ asperitatis severitas, ut SCto, Cenforioque edicto Rhetorices usu interdiceretur adolescentibus, lataque lege pellerentur, quicunque Philosophiam & Oratoriam profitebantur. Sed ubi e bello Punico secundo quies aliqua armiferis obtigisset viris; exemplo, ut ille ait: *Musa pennato gradu intulit se bellicosam in Romuli gentem, Urbique sapere cum pipere dedit & palmis*: Ennio primum, deinde Terentio, a Catone, Africano ac Lælio adamatæ Romamque perductis. Ab iis namque, quasi lumen aliquod Humanitatis accensum est, quod maximo splendore universam mox pervasit Italiam, eximiaque sua ac singulari pulchritudine omnes generosos cepit animos.

Unde

Unde postea felicissimo Augusti ævo in luculentissimam se diffudit eruditionis & elegantiae flamam, quæ totum illustravit orbem. Testes sunt in extremo Oriente Seres seu Sinenſes, quorum in media barbarie vicinarum gentium ea traduntur esse opera, & ab ingenio, & ab arte profecta, ut cana annalium vetustate omnia antiquissimorum populorum monumenta superent: inventis vero artibus ac disciplinis omnes nationes, priscas, & hodiernas longe antevertant. Quæ bona unice beneficio diuturnæ & inconcussæ Pacis consecuti sunt. Testes denique sunt plerique omnes Europæi, qui olim a cultioribus populis, ut erant, barbari habebantur & dicebantur: solis armorum studiis, venationibus, agrorum pecorumque culturis intenti: ignorantes arcana litterarum. Exin vero aliquo earum

rum splendore collustrati , intercedentibus subinde Pacis temporibus , primum difficulter ac male , postea felicius commodiusque pristinam Græcorum ac Romanorum Humanitatem æmulari atque referre cœperunt. Quam lucem nostra , avorumque nostrorum memoria ad eum claritatis apicem progressam , in ultimosque Septentriones penetrasse videmus: ut Roma & Athenæ vix quicquam habuerint, sive in cultu litterarum , sive in elegantia morum atque habitus , sive in præstantia operum , quo Orbem nostrum male possint urere.

Atque hoc , quod ego dico , videntur mihi acutissimi sapientiæ fabularis conditores arguto conclusisse involucro. Fingunt enim terram omnem initio fuisse aquis obductam: emerxisse primum Atticam , cujus amœnitate captos con-

D

ten

tendisse de constituendæ civitatis nomine Neptunum & Minervam : Jovi complacitum , ejus fore principatum , qui pulcherrimum atque utilissimum humano generi munus edidisset. Tum quidem Neptunum bellatorem produxisse equum ; vel ut alii volunt , fluctum excitasse marinum : Minervam vero florentem cum fructu produxisse oleam , quæ omnium prima in terris edita dicitur. Quare judicio vel Jovis , vel Cecropis superiorem , urbem ea in terra condidisse , eamque e nomine suo Athenas appellatam ex eo perpetua in tutela habuisse. Qua in fabula nescio fane , an vestigia majoris etiam veritatis lateant : nam ut columba a Noacho emissa , olivæque cum frutice ad ipsum rediens decrescientium aquarum , remissæque iræ divinæ exoptata index erat & nuncia ; ita certe olea apud omnes fere.

fere gentes Pacis , lenitatis , otii , rerumque florentium symbolum fuit. E sacris , instinctu inflatuque divino prolatis Oraculis cuivis id ad oculum patere potest. Quare flamines antiquitus , omnesque rei sacrae operantes : praeterea qui veniae rogandae , aut pacis petendae gratia oratores mittebantur ; vel olea coronati erant , vel ramos ex ea arbore , vittis interdum obligatos manu praetendebant : inprimis autem supplices , ut inviolabiles haberentur.

Jam vero pacifera illa oliva , ut Virgilio dicitur , a Minerva , quae litterati ocii , omniumque artium liberalium benignissima inventrix atque patrona perhibetur ; electa & producta est , cum unas Athenas , sacrarium illud eruditionis , ac domicilium omnis elegantiae suo munire vellet praesidio. Ut palam

D 2

fa-

facerent doctissimi homines , omnes cum artes præstantesque doctrinas oleo ac lucubrationibus indigere : tum magis etiam , perpoliendis ingeniis , excolendisque artibus , quæ ad Humanitatem pertinent , pacem necessariam esse ac securitatem. Quantopere enim Minerva, licet hasta , clypeo & galea armata pacem amet , eaque delectetur , significasse videntur ipsæ Amazones , nobiles illæ bellatrices ; quæ in Laconica Pallados *Ἀστρατείας* templum posuerunt.

Nec temere , vel ad delectandos puerorum tantum animos credamus ab Homero , sapientissimo veteris ævi homine , tam operose describi antrum illud Nympharum in Ithaca , in ejusque introitu passis ramis collocari olivam. Teste namque Porphyrio , antrum illud mundi typus est : & felix illa Palladis arbor pacem notat ac concordiam,
a fa-

a sapientia divina profectam, qua contineri totam hanc Universitatem patet. Quemadmodum & Lacedæmonii, devicto Xerxe, Euribadi coronam fortitudinis dederunt: at Themistocli sapientiæ præmium, oleaginam. Quare veritas apud Lucianum scriptorem lepidissimum ait: eum, qui inventus fuerit legitimus philosophiæ alumnus, olea redimitum iri. Nam Veteres eam quoque sacram fecerunt & Jovi, & Herculi Musagetæ, & Apollini. Fabulantur enim Latonam apud hanc arborem primum quievisse: atque ita tactis duabus plantis, olea & palma, Jovi postea gemellos enixam esse Dianam & Apollinem: documento ad colendas artes atque scientias industria opus esse, labore, pace.

Quanta vero vis sit in Pace ad alendam augendamque Humanitatem, & vicissim in hujus studiis ad concili-

andam firmandamque Pacem ac concordiam, venusto Symbolo nobis exprimit caduceum Mercurii, quod multis argumentum fuit & insigne Pacis: Mercurius enim non eloquentiæ tantum & mercaturis; sed & Paci præest. Quemadmodum Ægyptiis, qui huic omnes etiam bonas artes tribuunt, inter hieroglyphica symbola erat Deus Anubis, Mercurium referens; qui canis cervices duas attollens, læva caduceum, dextra palmam gerebat virentem. Complexus namque anguium in caduceo notat concordiam, quæ inter dissidentes & efferratos animos, virtute rationis atque orationis, tanquam ligno interjecto coalescit.

Quæ cuncta si perspicerent Reges ac Principes, eorumque virtus animi, ut Sallustius inquit, in Pace ita, ut in bello valeret; æquabilius atque constantius sese haberent res humanæ: neque mutari

tari ac misceri pestiferis bellis omnia cerneret. Sapientissimi certe optimique, quibus æquitas, sanctitas, religio & salus populi cordi erant; pacis, quam bellorum semper amantiores fuerunt: nec ad arma, nisi conservandæ vel restituendæ Pacis causa, ac difficulter descenderunt. Talis fuit inter Romanos Reges prudentissimus ille, ac religiosissimus Numa Pompilius ramis insignis olivæ; qui conditis optimis legibus, constitutisque cæremoniis, Pacis studio agrestem & ferocem mitigavit populum: atque ita non minora duraturi imperii fundamenta posuit, quam Romulus disciplina militari, rebusque fortiter gestis.

Quid reputemus enim? Duo sunt, quibus extulit ingens Roma caput, virtus belli & sapientia Pacis.

Ut scienter admodum cecinit, non
infi.

infimi spiritus vates Sulpicia. Nam quid proderat dissipatos palantesque homines in civitatem congregasse, nisi congregatos Humanitas ipsos ex feritate illa ad iustitiam atque mansuetudinem traduceret, traductosque ad hanc vitam humanitate perpolitam, Pax ipsos in societate & charitate contineret? Talis fuit generosissimus ac libertatis amantissimus Thrasybulus, qui cum patriam suam Athenas a triginta oppressam tyrannis, atrocissima servitute liberasset; nihil prius nec antiquius habuit, quam ut, pace reconciliata, saluberrimam illam *Αμνηστίας*, seu Oblivionis legem ferret: ac ipse oleagina corona donatus plus amoris, quam metus a civibus reciperet. Talis fuit & Cæsar Octavianus Augustus, qui rerum potens omni contentione id egit, ut quorumvis bellorum flamam in imperio Romano restingueret

ret, qui & aram Paci primus erexisse traditur, quam M. Agrippa laborum ac consiliorum ejus focius postea auxit ornavitque. Cujus prudentiæ, pacificique ingenii hunc quoque fructum tulit Princeps πολιτικώτατος, ut vere gloriari posset, Urbem lateritiam a se repertam, marmoream relinqui: artesque ac scientias suis temporibus ad eum evectas esse perfectionis gradum, quo sublimior nullus fuit. Uti hanc rem scitissimo emblemate exhibet nummus in honorem ipsius cusus; in quo conspicitur Pax sedens, dextra cornu copiae, & sinistra caduceum Mercurii continens, hac inscriptione: PAX AUGUSTI.

Atque hanc Pacis præstantiam viderunt e multis nonnulli alii: quales fuerunt M. Antoninus Philosophus, Martianus ac Leo Imperatores. Vidit hoc ipse inter barbaros excellenti ingenio vir Theodo-

E

ricus

cus Gothorum Rex , cuius hæc apud Cassiodorum notabilia sunt verba , scripta Anastasio Imperatori. *Oportet nos pacem quærere : hæc enim est bonarum artium mater : hæc mortalium genus reparabili successione multiplicat , facultates prociendit , mores excolit. Et tantarum rerum ignarus agnoscitur , qui eam minime quæsisse sentitur.* Vidit hoc nobilissimus fortissimusque Imperator Carolus Magnus ; qui cum triumphos triumphis cumulare posset , quovis modo quærebat Pacem , qua populis imperio suo subjectis augeret Humanitatem , pietatem & eruditionem. Et invenit serio expetitam sibi felicissimus Princeps , cumque ea quicquid ubique prosperitatis erat , Orbi Europæo reddidit. Vidit hoc ipsum præstantissimus ac sapientissimus Arragoniæ Rex Alphonsus : & quid illius non vidit solertia ? qui nulla de causa bellis defungi tanto pere

pere cupiebat, quam ut Musas in otio sanctius coleret, quam in castris. Viderunt id, hoc certe tempore si unquam, plerique omnes Europæ Principes, quorum consilia post tam grave, difficile ac diuturnum bellum, tandem ad opus Pacis, quod proximis diebus, adjutante Deo, feliciter ad finem perductum est, conversa sunt.

Pax etenim est sol, & vitalis quidam spiritus, quo cuncta, quæ bona dicuntur inter homines, novum quasi vigorem recipiunt, foveantur atque nutriuntur. Pax est aurea illa catena, quam Poetæ fingunt e cælo in terras dimissam; quæ omnium virtutum copulam habet sibi mutuo inhærentium. Pax est serenitas mentis, animi tranquillitas, amoris vinculum, consortium charitatis. Pace non modo ii, quibus natura sensum dedit, ut ait Cicero: sed

E 2

etiam

etiam tecta atque agri lætari videntur. In Pace præmia constant litteris, & bonæ menti honores. Quod Symmachus florentis Reipublicæ specimen esse dixit, si disciplinarum professoribus opulenta pendantur stipendia: fieri enim non potest, ut monet Tacitus, quin sublatis studiorum commodis, ipsa etiam studia pereant.

Huc ergo haud dubie respexerunt veteres illi, a quibus Pax ea effingebatur forma, ut spicam teneret: & oliva, interdum etiam rosa, vel lauro caput cincta esset. Quemadmodum & Pausanias refert in Atticis, quodam in loco apud Athenienses Plutonis fuisse statuem, qui puer a Pace nutrice portabatur. Nec minus hanc rem ad animum revocasse videntur illi, qui Pacem inter Numina retulerunt, ipsamque divinis honoribus atque cæremoniis affecte-

ce-

cerunt. Ita apud Athenienses Paci aræ constitutæ sunt, dicatumque est pulvinar, post superatos a Timotheo Lacones, ut tradit Nepos in vita ejus. Quamvis Plutarchus scribat, Pacis aras positas esse, post victoriam Cimonis ad Eurymedonta, cum conditionis Pacis Callias legatus Athenas a Persis attulisset. Romani priscae severitatis homines, etsi menti ædem in Capitolio voverint; bellis tamen innutriti & immo-rientes, Pacem fero coeperunt colere. Tum vero quanti ipsam, ejusque bona fecerint, non obscure declararunt, die festo constituto, quo sacra fierent tribus his tranquillis Numinibus, Jano, Paci ac Saluti. Nam quod Janus jungatur cum Pace, facile intelliget, quo pertineat; qui cogitaverit Pacem clauso ejus templo non tantum amanter sollicitèque contineri: verum etiam ip-

E 3

sum

sum Deum ideo pictum esse bifrontem, quia, ut notat Plutarchus, ferum illum & sylvestrem primorum hominum cultum in urbanum civilemque commutaverat.

Pacem itaque si tollas ex orbe literato, solem e mundo sustuleris. Dilabentur, ac sepulta jacebunt cuncta, foedo squalore, situ & illuvie obducta. Etenim, quod Plato de Adoniis hortis dicere solitus est, eos quidem voluptatis & amoenitatis refertissimos citissime nasci: multo vero citius, simulac vento aliquo tacti sint, iterum defluere ac interire; idem studiis Humanitatis simul atque belli aliqua tempestate affliguntur, accidere patet. Est quippe bellum pestilens aliquod sidus, quo afflatae disciplinae marcescunt & extinguuntur. Est tetra & immanis bellua, quae cum saevit in omnia, quae pulchra sunt & egregia:
tum

tum præcipue in litteras & artes. Mufæ autem funt virgines, teneræ, molles ac delicatæ, quæ non tantum clangores tubarum, fulmina gladiatorum, & dimicantium fugiunt tumultus: fed & Martem solo nomine horrefcunt. Quare Poëtæ eas removerunt ab omni armorum ftrepitu, ac collocarunt in amœnis feceffibus Parnaffi, Heliconis, Pindi, jugique Piërii.

Quod fi exemplis ex omni hiftoriarum memoria repetitis probatum dare in præfentia vellem, quanta mala atque damna bellum perpetuo intulerit ftudiis litterarum; merito vererer, ne me veftra prius, Auditores, attentio, quæ tamen fumma eft, quam materiæ copia deficiat. Tantum ergo, quod argumenti ratio poftulat, fumma rerum capita attingam, & oftendam, quomodo auguftum illud Humanitatis templum

plum per bella ita funditus deletum, excisum ac vastatum sit, ut ejus vix rudera atque parietinæ aliquæ superfuerint. Adeo ut, si infernæ Furiae præsentissimum litteris venenum miscere concupissent; nullum ego quidem præsentius, neque atrocius bello inveniri potuisse crediderim. Quid enim, nisi bella fuerunt, quæ aboleverint antiquissima litterarum sacra, totque recon-ditarum artium gazas, quibus excelluerunt, & Phœnices, & Chaldæi, & Israëlita, & Ægyptii, & Medi, & Persæ? Quid, nisi bella fuerunt, quæ Græciam matrem omnis elegantia, nutricem humanitatis, compendium eruditionis ita deformarint, suisque dispoliarint ornamentis, ut Græciam in Græcia frustra quæras? Quid porro, nisi bella fuerunt, quæ in ea Athenas, unicum illud omnis sapientia domicilium, Athenas clarissimum

simum illud mundi lumen, Athenas copiosissimum scientiarum emporium ita disturbaverint, exstinxerint, prostraverint, verterint, ut nulla Scylla, nulla Charybdis immani hiatu planius, aut plenius quippiam absorberit ac devoraverit.

Et quis jam mecum commigranteis inde in Italiam Musas sequatur; qui non simul cum dolore & ægrimonia animadvertat, exigui admodum temporis lætum illud, ac tranquillum existisse hospitium: statim vero ipsas iisdem bellorum procellis obrutas fuisse, disjectas atque oppressas? Non memorabo jam exitiales illos civilium discordiarum tumultus, qui cum optimos illis fidissimosque patronos eriperent, tum pretium ac venerationem earum haud mediocriter imminuebant. Non persequar hic continua illa, & asperri-

F

ma

ma adversus Parthos , Germanos , Dacos , Brittannos aliasque gentes bella , quibus plurimi a sacris Musarum avocabantur , peregrinisque moribus & verbis imbuebantur. Non demonstrabo Principes e media barbarie per insolentiam bellorum , bellantiumque ad summam rerum admotos : externos homines præcipuis imperiis ac magistratibus ornatos : agmina alienarum gentium in auxilium vocata , mediamque in Italiam fuisse recepta. Per quæ quantopere pudicitia nostrarum Dearum contaminata : opes attritæ : ac dignitas conculcata sit , quivis facile æstimare potest. Tantum dicam , nec sine horrore & perturbatione animi dicam novissima mala , quæ eas affligerint , exederint , tandemque pallidas & exsangues reliquerint.

At quæ fuerunt illa ? non Martis vis
& fu-

& furor tralaticius , qualem jam sæpe
senferant sustinuerantque: sed dira ejus-
modi rabies & immanitas , ut si vel
sexcentæ Erinnyes orco emissæ , Tarta-
reique Phlegethontis facibus armatæ , in
exitium earum conjurassent , graviori-
bus illas ærumnis afflictare non potuif-
sent. Quid enim ? Insano cum impe-
tu, con fractis quasi, convulsisque repagu-
lis , infestant atque dilacerant imperium
Romanum innumerabiles catervæ fero-
cissimarum gentium , quas natura edidit,
sol adspexit: Gothi , Vandali , Hunni ,
Bulgari , Quadi , Heruli , Longobardi ,
quosque plures barbaros , ac barbaris no-
minibus distinctos protrusit , vagina illa
ferarum gentium, Arc̃tos. Non levem hic
aliquis cladem , brevisque decessuram co-
gitet inundationem : sed diluvium ali-
quod universale , quod omnia occupa-
vit , opplevit , eruit. Alias ingruen-

F 2

tibus

tibus bellis , oræ certe quædam immunes ab illo contagio exstiterè , quo expulsæ Musæ avolarent. Nunc vero, qua patebat orbis Romanus , barbaris his omnia tenentibus , dum Persæ & Saraceni premerent orientem , indagine quasi conclusis nulla dabatur effugiendi via: sed sub cruento Martis gladio erat fatiscendum. Quis itaque miretur , quicquid aliquam habebat Humanitatis speciem , id omne sublatum & corruptum fuisse; cum hi non , ut olim Galli Senones , vel ut Cimbri ac Teutones , terras Romanas invaderent , agrisque devastatis , oppidis captis , præda onusti ad suos reverterentur: sed totos quadringentos per annos Italiam insiderent , regnisque constitutis , arbitrium rerum per plures Gothorum ac Longobardorum reges ad posteros transmitterent?

Quis vero sigillatim explicet omnes
illas

illas malorum facies: horrendas cædes,
direptiones bonorum, excisas urbes,
expilata fana ac templa, concrematos
libros, exustas ædes, diruta atque de-
jecta nobilissima opera, quorum cada-
vera hoc etiam die admirationem, si-
mulque commiserationem fui adspicien-
tibus injiciunt? Quis hic etiam non ag-
noscat præcipuam providentiæ divinæ
bonitatem, ullos adhuc veteres super-
esse auctores: ac veluti pauculas ex hor-
rendo illo naufragio enataste tabulas;
cum hi barbari in quascunque bibliothe-
cas inciderent, libros comportatos,
tanquam inutilem & vilem prædam
comburerent? O fundi litterarii calami-
tatem maximam! O Humanitatis dam-
num irreparabile! O bellum, bellum
pestem litterarum certissimam!

Hinc jam postea videas barbariem la-
te per omnem orbem grassantem, &

F. 3

quic-

quicquid fuerat pietatis , eruditionis ,
elegantiae , bonique saporis plus quam
Cimmeriis ignorantiae tenebris obrutum .
Nulla profecto fuit ars , nulla scientia ,
quam hoc malum non pervasit atque ita
pervertit , ut e pristina forma præter no-
men nihil retineret . Et quanquam Caro-
lus Magnus , ejusque posterī sedulo labo-
rarint in recreandis litteris , nihil vel pa-
rum admodum efficere potuerunt , om-
nibus ita collapsis ac deperditis , ut vi
humana restitui non posse viderentur :
bellis quoque subinde Europam concu-
tientibus , quæ vel Saraceni , vel Saxo-
nes , vel Normanni concitarant : vel
interna inter Principes dissidia , vel ma-
gis etiam Papales furiae . Donec Deo Hu-
manitatis auctori , statore ac vindici , jam
abhinc duobus tribusve seculis , visum
fuit misereri caligantis humani generis ,
lucemque litterarum e tenebris reducere :
quam

quam inter nos hac etiam die coruscantem contemplari licet.

Nos igitur Auditores; cum in id temporis ætas nostra inciderit, quo discussis belli nebulis, ferena Pacis lux refulsit, de tam ingenti bono nobis gratulemur, Deoque gratias agamus maximas; tum id ad ejus honorem & gloriam convertamus. Nam ut maris cælique temperiem turbines tempestatesque commendant; ita ad augendam Pacis hujus gratiam, calamitosissimi illius belli tantum tumultum præcessisse putemus. Quod si ergo vobis probatum existimetis, quod intenderam, Pacem esse nutricem Humanitatis; in hujus quæso studia, dum hæc alcedonia atque malaciæ excipiunt rabidas bellorum procellas, toto animo, mente, cogitatione, omnibusque viribus incumbite: tum liberos vestros, carissima illa pignora consecrare

crare iis artibus, quarum tantam videtis esse præstantiam & utilitatem, ne dubitetis. Intellexistis, in quanto pretio, & veneratione mihi sit Humanitas; pro eo animo bene de prole vestra mereri non defatigabor. Spem de me & informatione mea conceptam, ut adimpleam, manibus pedibusque obnixe faciam omnia.

Verum licet omnis mea hodie in laudanda & Pace, & Humanitate, quam utramque animo meo carissimam perpetuo habui, versata sit Oratio; tamen ne credatis inepta me facilitate & indulgentia vestros tractaturum liberos. Quo quidem malo rei Scholasticæ nihil pejus, nihil fieri potest damnosius. Leni me esse, ac mansueto ingenio norunt, quotquot me norunt: non ita nihilominus, ut in vitiis discipulorum conniveam, poenasque averfer, quas adolescen-

ſcenti utiles nonnunquam eſſe , atque neceſſarias monet ratio, monet & ipſa ſuprema Sapientia. Prudentiſſimum equidem magnanimi Epaminondæ dictum eſt : *paritur Pax bello.* Nam, uti nos tot jam annos , quod ſapientiæ eſt , Pacis cauſſa bellum geſſimus , & labores ſpe otii ſuſtinuimus ; ita certe nec Pax , nec Humanitas in Scholis , hac juventutis pravitate , ſine poenis & caſtigatioribus conſervari poteſt. Neque ab hoc ſenſu alienos eſſe vos , Leovardiennes , non leviter adumbratum , ſed expreſſum ſignum mihi fuit illa , quam ante triduum januæ alicui in hac Curia præſcriptam legi , nec ſine voluptate legi ſententiam ; quippe quæ talis eſt , ut illa non ſymbolum modo Civitatis veſtræ videatur continere : ſed etiam memoria dignam Reipublicæ capeſſendæ , atque Scholæ adminiſtrandæ auctoritatem

G

ritatem disciplinamque præscribere. Etenim, cum vos ita statueritis rem gerendam esse: PACE ET JUSTITIA, fieri non potest, quin diviniore aliqua mens vos agita-
verit. Nam, ut cœlestis beneficii est, siquando Pax & Justitia se invicem amplexentur; ita Pax eleganter a Pindaro vocatur justitiæ *ὁμότροπος*, id est, iisdem moribus prædita, & alibi, tranquillitas justitiæ filia.

In Schola autem, quæ parvæ civitatis instar est, justitiam quoque servandam esse; & ut præmia bonis, ita poenas malis distribuendas esse, quis non videt? Id certe judicavit inclytus atque eruditus ille Frisius, Viglius Zuichemus ab Aita, qui ad Carolum V. Imperatorem scripsisse legitur, omnibus non tantum judiciis, tribunalibus & curiis: sed & Scholis appingendum esse hunc Virgilii versum.

Di-

Discite justitiam moniti, & non temnere divos.

Dum nimis, credite mihi, frenum laxatur juventuti, plus fatis alioquin ferocienti via sternitur ad interitum expeditissima. Auriga nimium remittens habenas, & equos, & semet ipsum lædit ac corrumpit. Ut enim e disciplinæ sinu omnes manant triumphi, teste Valerio Maximo: sic e laxioris disciplinæ sinu, omnes manant calamitates ac miseriæ. Quod si remissior ea postuletur, & peccata discipulorum impunita dimittantur, vel parentum ac propinquorum precibus condonentur; ilicet, actum est de Schola vestra, nec ipsa, si cupiat, Salus eam servare possit! Atque hæc pestis est, quæ tot egregias Scholas & Academi-
as perdidit: tot bonos præceptores inutil-
es, suæque Spartæ ineptos reddidit. Unicum exemplum sit Schola Beryti-
ensis, quæ olim audiebat legum nu-
G 2 trix,

trix, totius Phoeniciæ phoenix, orbis Romani musæum, justitiæ tribunal augustissimum: sed nimia indulgentia in omne scelus & injustitiam, in nequitiam & effrenem degeneravit petulantiam: atque ita inopinatum sibi concitavit exitium. Necessariæ itaque disciplinæ & animadversioni liberos vestros ne subducatis: imo eam ægre ne feratis: sed ultro probetis ac laudetis. Ita & in liberos vestros, & in Scholam vestram optume consulitis: & nobis muneris nostri partes non reddetis acerbas, vel inutiles.

Vobis autem, Nobilissimi & Amplissimi hujus Urbis Proceres, non habendas, nec agendas tantum: sed referendas immortaleis a me esse gratias, quid ego profitear? Quis enim, vel me tacente, id non videt? Me miserum vero, si vel tralaticiiis, vel multa
cura

cura exquisitis gratiarum agendarum
formulis, digne, plene, ac legitime pro
tanto munere satisfieri Vobis a me pos-
se existimem! Ab inani verborum appa-
ratu candorem vestrum, & modesti-
am abhorrere persuasum habeo. Unum
Vobis in votis, unum esse in deliciis
perspexisse mihi videor: vestri scilicet
Gymnasii salutis procurandæ studium
& ratio. Hæc ego sequar: his mihi
prius nec antiquius nihil quicquam erit.
Adversarias quidem graves, easque plu-
res mihi constitutas video: meritum
vestrorum in me magnitudinem: Urbis
Gymnasiique decus ac celebritatem: ex-
pectationem incredibilem: facultatum
& copiarum mearum tenuitatem. Quæ
cuncta nulla, nisi una re superari a me
posse confido; si quicquid in me est
vel notitiæ, vel dexteritatis, id in
commodum juventutis vestræ sedulo

conferam: ac notabilis ad id ut fiat accessio, nihil reliqui faciam.

Neque vero, Reverendi atque Eruditissimi Viri, quibus juxta me Scholarum cura mandata est, id mihi negligendum putabo, ut me favore & amicitia vestra dignum præstem. Vos quicquid ejus est, mihi ne denegetis, precor etiam atque etiam. Ego quantum in me est, omnibus Humanitatis officiis, auctoritati obsecundando, consiliis salubribus morem gerendo, Vos colam, venerabor ac suspiciam.

Vos quoque, Collegæ Doctissimi & Vigilantissimi, non salutatos dimittere vetat arctissima illa, quæ inter nos intercedat, oportet, necessitudo; cujus sancta jura inviolata ut fervemus, vos rogo & obtestor. Pacis studiosum me esse, amantem Humanitatis, cum præsens hæc oratio; tum vel
in

inprimis hætenus exactæ , & in posterum exigendæ , vitæ meæ cursus ac ratio Vobis declarent , volo. Sortis conditionem experti nostræ , ad continendam protervam juventutem auctoritate novistis nihil esse aptius , nihil efficacius. Hæc vero vilescat , necesse est , & intereat , ubi Collega Collegam vel calumniis ac maledictis clanculum mordet , vel conviciis palam infectatur.

Tandem ut vela contraham , quid reliquum est , nisi ut vos , præstantissimi Adolescentes , carissima mihi capita , compellem ? Brevibus tamen id conficere annitar : tantas enim ipsius Humanitatis dotes esse & illecebras existimo , ut nullis ego indigeam verborum lenociniis , vel mellitis globulis , ad Vos inflammandos atque exhortandos. Quæcunque namque in hac vita suavia , vel expetenda sunt hominibus , ea in
Vos

Vos abunde conferet hæc ipsa Humanitas, virtutis faulrix, pietatis procreatrix. Ejus studia, ut præclare Cicero: *adoleſcentiam alunt, ſenectutem oblectant: ſecundas res ornant, adverſis perſugium ac ſolacium præbent: delectant domi, non impediunt foris: pernoctant nobiſcum, peregrinantur, ruſtificantur.* Hoc erat, quare Minerva, ut eſt in fabulis, judice ipſo Jove, merito ſapiens diceretur, & ſapientiæ præſes; quod olivam legiſſet, quæ ſua in tutela eſſet, cæteris Diis ſteriles fumentibus arbores.

Quod ſi ulla tempora ſedulam hujus Humanitatis curam poſtulant, næ eam requirit hæc dies: *in turbis quippe ac diſcordiis*, ut docet Tacitus, *peſſimo cuique plu- rima viſ: Pax & quies bonis artibus indigent.* Alacri itaque animo graduque contentis ad amœnum eruditionis verticem; quo facile pervenietis, comites vobis
ſi ad-

si adſciſcatis duas illas Sorores , quas
Cebes adſcendentibus ad ſapientiæ tem-
plum manus porrigere memorat , con-
tinentiam nempe ac tolerantiam. La-
bore opus eſt , ſine quo nihil præclari a
mortalibus effici poteſt : ſed inprimis lit-
terarum ſacra conſtare nequeunt. E rupe
ſcilicet florentem Minerva cum fructu
oleam produxit. Unum & hoc vos mo-
neo ; ſpes veſtras , ut ille ait , ambitioni
ne donetis : ſed ſevera lege proficere ani-
mus ſit. Olea , dilecta illa Palladis ar-
bor , haud inveniſte adhibebatur ab
antiquis ad coronandos mortuos , vel
inducendas ſepulchris umbras ; propte-
rea quod , cum cupreſſo lauroque , ſem-
per virentem alit frondem , nec cadu-
ca dimittit folia : ſed ſimul radices
agit longius ; quare e lege Gelonis no-
vem ab alieno agro pedes ſerenda erat.
Quid ergo ? non ſedendi hic , aut cun-
ctan

ctandi tempus. Occasio brevis, elapsam
semel ne ipse possit Jupiter reprehен-
dere. Commodis ego vestris, omni
cum animi impetu, consulam: via
vos ducam amoena, facili, & plana.
Vos tantum mihi vicem rependatis,
præstando debitum obsequium. Vale-
ant igitur, quibus alias res sectari vo-
lupe est, quique se falsis duci ac lactari
patiuntur gaudiis. Sibi habeant instru-
menta fordidarum voluptatum: sibi
luxuriæ apparatus: sibi congestas divi-
tias: sibi lubricos favores & instabiles
honores. Supra vulgus sapiatis, ac
præstetis Vos adolescentes,

— — — *quibus arte benigna,*
Et meliore luto finxit præcordia Titan.

Ut ita studiorum hoc, vitæque curri-
culum emensi ad beatas cœlestium sedes
læti transferamini.

D I X I.

m
r
ni
a
.
t
y
i
l
l
s
c
s
s

